

- केंद्रीय मंत्रिमंडल री माली मामलां री समिति 24 हजार 634 करोड़ रुपया रा खर्च वाळी चार रेल परियोजनावां ने मंजूरी दीनी।
- अंता विधानसभा हलका मांय 11 नवम्बर ने व्हेवण वाळा उपचुनाव सारु मतदान केन्द्रां री तादाद बधायी ज्यी।
- गुजरात रा सूरत मांय काल “प्रवासी राजस्थानी सम्मेलन” राख्यो जावेला।
- जयपुर रा जवाहर कला केन्द्र मांय आज लोकरंग उत्सव सुरु व्ह्यो— बाड़मेर मांय काल थार महोत्सव सुरु व्हेला।

000

केंद्रीय मंत्रिमंडल री माली मामलां री समिति 24 हजार 634 करोड़ रुपया रा खर्च वाळी चार रेल परियोजनावां ने मंजूरी दीनी है। आज नई दिल्ली मांय व्ही कैबिनेट री मीटिंग पाछे सूचना अर प्रसारण मंत्री अश्विनी वैष्णव खबरनवीसां ने आ जाणकारी दीनी। वे बतायो के अ परियोजनावां महाराष्ट्र, मध्य प्रदेश, गुजरात अर छत्तीसगढ़ रा 18 जिलां मांय चलायी जावेला। वे कह्यो के इण ऊं रेलवे रो मौजूदा नेटवर्क करीब 894 किलोमीटर बढ़ जावेला।

.....

000

केंद्र सरकार आग बुझावण री सेवावां ने और बधावण अर बेहतर बणावण सारु राष्ट्रीय आपदा प्रतिक्रिया कोष रा तैत राजस्थान, हरियाणा अर मध्यप्रदेश सारु 903 करोड़ रुपया ऊं बत्ती रकम मंजूर कीनी है। केंद्रीय गृह मंत्री अमित शाह री सदरत वाळी एक समिति आ रकम मंजूर कीनी। राजस्थान ने 388 करोड़ रुपया ऊं बत्ती रकम दीरीजी है। गृह मंत्रालय रे मुजब चालू माली साल रे दौरान, केंद्र सरकार राज्य आपदा प्रतिक्रिया कोष ऊं 27 राज्यां ने 13 हजार 603 करोड़ रुपया अर एन.डी.आर.एफ. रा तैत 12 राज्यां सारु दो हजार करोड़ रुपया ऊं बत्ती रकम जारी कीनी है।

000

अंता विधानसभा हलका मांय 11 नवम्बर ने व्हेवण वाळा उपचुनाव मांय वोट देवण वाळां रा सुबीता सारु मतदान केन्द्रों री तादाद बधायी ज्यी है। राज्य रा मुख्य निर्वाचन अधिकारी नवीन महाजन आज जयपुर मांय खबरनवीसां सागे बातचीत करता थकां आ जाणकारी दीनी। वे बतायो के हलका मांय स्वतंत्र अर बिना डर मतदान सारु ज़रूरी तैयारियां करी जा रही है। उपचुनाव रा ऐलाण सागे ई पूरा बारां जिला मांय चुणाव आदर्श आचार संहिता लागू व्हे ग्यी है। वे बतायो के वोटर लिस्टां मांय 11 अक्टूबर ताई नाम मंडाया, हटाया या अपडेट कर्या जा सकेला।

.....

ई बीचे बारां रा जिला कलेक्टर रोहिताश्व सिंह तोमर अर एस.पी. अभिषेक अंडासु आज खबरनवीसां अर सियासी पार्टियां रा नुमाइन्दां ने निर्वाचन विभाग री गाइड लाइन रा बारा मांय जाणकारी दीनी। एस.पी. बतायो के उपचुनाव रे दौरान हलका मांय हिफाजत रा सगळा ज़रूरी बंदोबस्त कर्या जावेला।

.....

000

जयपुर जिला मांय जोबनेर रा श्री कर्ण नरेन्द्र कृषि विश्वविद्यालय रा कुलगुरु डॉ. बलराज सिंह ने मुअत्तल कर दिया ज्या है। विश्वविद्यालयां रा कुलाधिपति हरिभाऊ बागड़े ई बाबत हुकम जारी कर दीना है। कामकाज रा आखिरी तीन महीना मांय नीतिगत फैसला लेवण अर वां रे खिलाफ मिली गंभीर शिकायतां रे कारण ओ फैसलो करी ज्यो है।

000

जयपुर रा सवाईमानसिंह अस्पताल रा ट्रॉमा सेंटर रा आईसीयू मांय लाय लागण रा वाकया पाछे चिकित्सा विभाग अर प्रशासन री ओर ऊं न्यारा-न्यारा जिलां रा मोटा अस्पतालां मांय आग बुझावण री व्यवस्था री जांच करी जा रही है। ई सागे ई अस्पतालां मांय संकट रे दौरान निकळबा रा गेला अर दूजा हादसां रा हालात रो सामो करण री तैयारियां रो जायजो ई लियो जा रह्यो है। जोधपुर रा मथुरा दास माथुर अस्पताल मांय लाय बुझावण री मशीनां री जांच अर मॉक ड्रिल करीजी। भीलवाड़ा मांय महात्मा गांधी अस्पताल रा आई.सी.यू. अर एन.आई.सी.यू. समेत न्यारा-न्यारा वार्ड मांय आग बुझावण री मशीनां ने काम ले र परखी ज्यी। जयपुर रा सवाईमानसिंह अस्पताल रा ट्रॉमा सेंटर मांय लाय लागण रा वाकया पाछे मरीजां रा आपातकालीन आपरेशन मांय परेशानी आ रही है।

000

गुजरात रा सूरत मांय काल 'प्रवासी राजस्थानी मीट' राखी जावेला। ई रा तैत मुख्यमंत्री भजनलाल शर्मा वठे रा खास कारोबारियां अर कारोबार जगत् रा नुमाइंदां ने प्रदेश मांय निवेश करण अर राज्य रा सामाजिक-आर्थिक विकास मांय योगदान देवण सारु न्योतो देवेला। ओ आयोजन ई साल 10 दिसम्बर ने जयपुर मांय व्हेवण वाळा 'प्रवासी राजस्थानी दिवस' कार्यक्रम मांय बत्ता ऊं बत्ता लोगां री भागीदारी तैय करण रा मकसद ऊं कर्यो जा रह्यो है। प्रवासी सम्मेलन पाछे मुख्यमंत्री भजन लाल शर्मा री अगुवाई मांय राज्य सरकार रा नुमाइंदां रो दल सूरत मांय दवाइयां, कपड़ा, सिरेमिक्स अर पेट्रोकेमिकल्स सरीखा हलकां रा खास अहलकारां ऊं मुलाकात करेला।

000

प्रधानमंत्री सूर्य घर मुफ्त बिजली योजना रा तैत सरकारी बैंक 10 हजार नौ सौ 77 करोड़ रुपया रा पांच लाख ऊं बत्ता कर्ज मंजूर कीना है। वित्त मंत्रालय रे मुजब प्रधानमंत्री सूर्य घर मुफ्त बिजली योजना सारु कर्ज देवण रा काम ने आसान बणावण सारु सरकारी बैंकां रे मार्फत कम ब्याज परां कर्ज मुहैया कराया जा रह्या है। ई सारु जनसमर्थ पोर्टल रे मार्फत कर्ज री अर्जियां माथे ऑनलाइन तरीका ऊं कार्रवाई करी जावे है।

000

जयपुर रा जवाहर कला केन्द्र मांय आज लोकरंग महोत्सव सारु व्ह्यो। 17 अक्टूबर तांई चालण वाळा ई महोत्सव मांय महाराष्ट्र, पंजाब, उत्तरप्रदेश, मध्यप्रदेश, असम, त्रिपुरा, उत्तराखण्ड अर हिमाचल प्रदेश समेत न्यारा-न्यारा प्रदेशां रा अढाई हजार ऊं बत्ता लोक कलाकर कार्यक्रम पेश करेला। ई मौके राष्ट्रीय हस्तशिल्प मेळो ई लगायी ज्यो है। बाड़मेर मांय ई काल थार महोत्सव सारु व्हेला। "रंग रेगिस्तान के" मुद्दा माथे राख्या जावण वाळा ई महोत्सव मांय भांत-भांत रा सांस्कृतिक कार्यक्रम पेश कर्या जावेला। जिला कलेक्टर टीना डाबी आज ई महोत्सव रा पोस्टर रो विमोचन कीनो। वे पीळा चावल बांट र जनता ने महोत्सव मांय शामिल व्हेवण रो न्योतो दीनो। म्हाणा खबरनवीस बतायो के महोत्सव सारु जिला प्रशासन जोरदार तैयारियां कीनी है।

.....

000

मौसम विभाग आज जयपुर, दौसा, अलवर, भरतपुर, धौलपुर, करौली, बारां, कोटा, नागौर, सीकर, अजमेर, भीलवाड़ा अर चूरु जिलां मांय बरसात रो येलो अलर्ट जारी कीनो है। आं हलकां मांय हल्की ऊं मझला दर्जा री बिरखा सागे जोरदार बायरो बाजण रा आसार है। ई रे अलावा बीकानेर संभाग मांय कठे-कठे बारिश री संभावना है। राज्य मांय काल ऊं आवता एक सप्ताह तांई मौसम सूखो रेहवण री संभावना है। ई बीचे लारला चौबीस घंटा मांय सब ऊं बत्ती 13 सेंटीमीटर बारिश नागौर जिला रा कुचामनसिटी मांय दर्ज करीजी। श्रीमाधोपुर मांय 11, शाहपुरा मांय 9, विराटनगर मांय 8 अर चौथ का बरवाड़ा मांय 7 सेंटीमीटर मेह बरस्यो। राज्य रा आतूणी हलकां मांय आज आखा दिन बादळा मंड्या रह्या अर सीळो बायरो बाज्यो।

000

अलवर पुलिस हिंदू महिलावां अर पुरुषां ने ईसाई धर्म अपनावण सारू लोभ देवण अर डर बतावण रा आरोप मांय पाँच जणां ने गिरफ्तार कीना है। एस.पी. सुधीर चौधरी आ जाणकारी दीनी। वे बतायो के पुलिस ने ई बारा मांय मिली जाणकारी पाछे बड़ौदामेव रा थानाधिकारी कानी ऊं करीजी जाँच मांय आरोपितां कानी ऊं हिन्दू धर्म रे खिलाफ गलत बातां फैलावण री ठा पड़ी। गिरफ्तार करी ज्या आरोपितां रा सम्पर्क अलवर, उत्तरप्रदेश रा मुरादाबाद अर जयपुर मांय व्हेवण री जाणकारी मिली है। पुलिस मामला री जांच कर रही है।

000

राज्य मांय खरीफ-2025 सीजन मांय किसानां ने बीजां रा 27 लाख 95 हजार ऊं बत्ता मिनिकिट मुफ्त बांटी ज्या है। इण मांय राष्ट्रीय खाद्य तेल मिशन रा तैत मूंगफली अर सोयाबीन रा 18 हजार 966 मिनिकिट अर राष्ट्रीय खाद्य सुरक्षा मिशन रा तैत उड़द, अरहर अर ज्वार रा 2 लाख 16 हजार ऊं बत्ता मिनिकिट किसानां ने दिया ज्या है। महिला किसानां ने ई बीज मिनिकिट मुफ्त दिया ज्या है। बीज बांटण रो काम साफगोई सागे करण सारू ओ काम जन आधार कार्ड रे मार्फत कर्यो जा रह्यो है।

000

भारत री लिन्थोई चानम्बम पेरू मांय जूडो री जूनियर विश्व चैम्पियनशिप मांय भारत ने पहलो तमगो दिरायो है। लिन्थोई महिलावां रा 63 किलोग्राम भार वर्ग मांय नीदरलैंड्स री जोनी जिलियन ने शिकस्त दे र कांसा रो तमगो जीत्यो।

000